



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL

Komunikadu Imprensa

06/13/2013

Tribunál Distritál Baucau kondena arguidu ba kazu violénsia doméstika ho pena multa dollar \$90.00

Iha 12 Juñu 2013, Tribunál Distritál Baucau lee sentesa ba arguidu ba akzu ofensa ba integridade fízika simples ho natureza violénsia doméstika hasoru vítima ne'ebé nu'udar arguidu nia fen. Tribunál kondena arguidu ho pena multa dollar \$90.00. Kazu ne'e akontese iha 03 Agostu 2011, iha Distritu Viqueque no rejista iha Tribunál Distritál Baucau ho número prosesu 59/Crm.S/2012/TDB.

Pena ne'e sei selu kada loron US\$ 1.00, maibé kuandu arguidu la kumpri pena multa ne'e durante loron 90 nia laran, arguidu sei ba hela iha prizaun durante loron 60.

“JSMP rekoñese katak pena multa nu'udar forma ida husi pena ne'ebé estabelese iha Kódigu Penál, maibé JSMP enkoraza tribunál atu avalia pena multa nia efetividade hodi prevene violénsia doméstika iha futuru” dehan Direitór ezekutivu JSMP, Luis de Oliveira Sampaio

Ministériu Públiku akuza katak iha 03 Agostu 2011 arguidu haksasuk malu ho vítima no baku dala rua iha vítima nia hirus matan, tuku dala ida iha ulun no dudu monu vítima ba rai. Ministériu Públiku akuza arguidu nu'udar autór material ba kazu krime ofensa ba integridade fizika simples ne'ebé preve iha artigu 145 Kódigu Penál konjuga ho artigu 35 Lei Kontra Violénsia Doméstika.

Audiénsia ne'e realiza sein prezensa arguidu nian mesmu tribunál notifika ona. no defeza mak reprezenta arguidu hodi rona sentensa.

Audiénsia julgamentu ne'e dirije husi juis singulár Dr. José Gonçalves, Ministériu Públiku reprezenta husi Dr. Pascasio de Rosa Alves no arguidu hetan defeza husi Dr. Rui Manuel Guterres husi Defensoria Públiku.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl